

आकाशवाणी जयपुर—अजमेर

प्रादेशिक समाचार

दिनांक 20.09.2024

समय: 18.45 बजे

- प्रधानमंत्री नरेन्द्र मोदी कारीगरां ऊं विश्वकर्मा योजना रो फायदो ले र कारोबारी बणवा री अपील कीनी।
- राज्यपाल हरिभाऊ बागडे जनजातियां रा लोगां रा पूरा उत्थान सारू बुनियादी शिक्षा मांय सुधार माथे जोर दीनो।
- मुख्यमंत्री भजन लाल शर्मा ब्रिटिश उप उच्चायुक्त स्टीव हिकलिंग सागे राइजिंग राजस्थान इन्वेस्टमेंट समिट मांय ब्रिटिश निवेशकां री भागीदारी रा बारा मांय चर्चा कीनी।
- प्रदेश मांय स्वच्छता ही सेवा अभियान रा तहत न्यारा—न्यारा कार्यक्रम राखी ज्या।

000

प्रधानमंत्री नरेन्द्र मोदी कारीगरां ऊं प्रधानमंत्री विश्वकर्मा योजना रो फायदो ले र कारोबारी बणवा री अपील कीनी है। वे प्रधानमंत्री विश्वकर्मा योजना रो एक साल पूरो व्हेवण रे मौके आज महाराष्ट्र रा वर्धा मांय राखी ज्या कार्यक्रम मांय बोल रह्या हा। प्रधानमंत्री कह्यो के पी.एम. विश्वकर्मा योजना भारत ने विकसित देश बणावण सारू परंपरागत कौशल ने बधावो देवण रो खास जतन है। वे कह्यो के ई योजना रा तैत बिना गारंटी तीन लाख रुप्या ताई रो कर्ज मुहैया करायो जावे है।

प्रधानमंत्री ई योजना रो फायदो लेवण वाळा एक लाख ऊं बत्ता लोगां ने डिजिटल पहचान पत्र अर डिजिटल कौशल प्रमाण पत्र ई जारी कीना। वे फायदो लेवण वाळा 75 हजार जणां ने कर्ज री मंजूरी रा डिजिटल सर्टिफिकेट ई जारी कीना। प्रधानमंत्री मित्र वस्त्र पार्क बणावण रा काम री नींव ई रखी।

ई मौके जयपुर मांय राखी ज्या राज्य स्तर रा कार्यक्रम मांय उपमुख्यमंत्री दिया कुमारी कह्यो के ई योजना ऊं 18 पारम्परिक कलावां ऊं जुड़्या कारीगरां ने आगे बढ़बा रा मौका मिल्या है। वे कह्यो प्रधानमंत्री री सोच "हुनर से होगा देश का नवनिर्माण" ई योजना रे मार्फत सांची व्हे रही है। कार्यक्रम मांय जयपुर री सांसद मंजू शर्मा ई सिरकत कीनी। बाड़मेर जिला रा रामसर मांय राखी ज्या कार्यक्रम मांय प्रधानमंत्री नरेन्द्र मोदी आई.टी.आई. रा विद्यार्थियां सागे वर्चुअल तरीका ऊं बातचीत कीनी। ई मौके वाणिज्य अर उद्योग राज्य मंत्री के. के. विश्नोई ई मौजूद हा।

000

केंद्रीय स्वास्थ्य मंत्री जगत प्रकाश नड्डा कह्यो है के सरकार आयुष्मान भारत— प्रधानमंत्री जन आरोग्य योजना रो फायदो 70 साल अर बत्ती उम्र रा लोगां ई देवण रो फ़ैसलो कीनो है। वे आज नई दिल्ली मांय मोदी सरकार रा तीजा कार्यकाल मांय वां रा मंत्रालय री 100 दिन री उपलब्धियां रा बारा मांय जाणकारी दे रह्या हा। नड्डा कह्यो के इण रो मकसद करीब साढे चार करोड़ पिरवारां रा छह करोड़ बुजुर्गां ने पांच लाख रुप्या रा मुफ्त स्वास्थ्य बीमा रो सुबीतो मुहैया करावणो है।

000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी ज्यी है। इण मांय आज पेश है सरकार कानी ऊं स्टार्ट अप्स अर ईको सिस्टम रा बारा मांय करी ज्या फैसला री जाणकारी—

000

राज्यपाल हरिभाऊ बागडे जनजातियां रा भला सारू बुनियादी शिक्षा मांय सुधार अर प्राथमिक शिक्षा ने बेहतर बणावण माथे जोर दीनो है। वे आज बांसवाड़ा मांय जिला स्तर रा अहलकारां सागे मीटिंग मांय बोल रहया हा। राज्यपाल केन्द्र अर राज्य सरकार री योजनावां रो फ़ायदो बत्ता ऊं बत्ता पात्र लोगां तांई पूगावण माथे जोर दीनो। वे प्रधानमंत्री ग्राम सड़क योजना, जल जीवन मिशन ऊं जुड़्या काम अर सूरज री रोशनी ऊं बिजली बणावण रा काम तेजी ऊं करण रा हुकम दीना। राज्यपाल साक्षरता अभियान अर बेटी बचाओ—बेटी पढ़ाओ समेत न्यारा—न्यारा अभियान अर कार्यक्रममां ने और बेहतर तरीका ऊं चलावण माथे जोर दीनो।

000

ब्रिटिश उप उच्चायुक्त स्टीव हिकलिंग आज जयपुर मांय मुख्यमंत्री भजनलाल शर्मा सागे मुलाकात कीनी। ई दौरान मुख्यमंत्री ब्रिटिश उप उच्चायुक्त सागे 9 ऊं 11 दिसंबर बीचे राख्यी जावण वाळी 'राइजिंग राजस्थान इन्वेस्टमेंट समिट' मांय ब्रिटिश निवेशकां री सहभागिता रा बारा मांय चर्चा कीनी। मुख्यमंत्री ब्रिटिश उप उच्चायुक्त ने राजस्थान मांय निवेश रा मौकां, माली बरकत री संभावनावां अर प्रदेश री निवेश अनुकूल नीतियां रा बारा मांय जाणकारी दीनी। ब्रिटिश उप उच्चायुक्त मुख्यमंत्री ने सूरज री रोशनी ऊं बिजली बणावण मांय राजस्थान रे देश मांय अव्वल रेहवण परां बधाई दीनी।

00000

“स्वच्छता ही सेवा” अभियान रा तहत प्रदेश मांय न्यारा—न्यारा कार्यक्रम राख्या जा रहया है। जयपुर मांय केन्द्रीय संचार ब्यूरो री ओर ऊं **स्वच्छता ही सेवा अभियान— “स्वभाव स्वच्छता संस्कार स्वच्छता”** रा तहत आज सफ़ाई रा प्रति महात्मा गांधी री सोच ने समर्पित मोटा चित्र लगायी ज्या। केन्द्रीय संचार ब्यूरो अर पत्र सूचना कार्यालय री अपर महानिदेशक ऋतु शुक्ला बतायो के केन्द्रीय सदन रे बाहर अ फोटो लगावण रो मकसद साफ—सफ़ाई राखण मांय जनता री भागीदारी ने बधावो देवणो है। जयपुर रा केंद्रीय सदन मांय “स्वच्छता ही सेवा” संदेश सागे खुद री फोटो खींचण री ठौड़ ई बणायी ज्यी है। पत्र सूचना कार्यालय जोधपुर री ओर ऊं वेबिनार राख्यी ज्यी। वेबिनार मांय फ्रंटियर मुख्यालय बीएसएफ, जोधपुर रा उपमहानिरीक्षक विदुर भारद्वाज अर पत्र सूचना कार्यालय अर केंद्रीय संचार ब्यूरो, राजस्थान रीजन री अपर महानिदेशक ऋतु शुक्ला ई सिरकत कीनी। **श्रीगंगानगर** मांय निबंध होड़ राख्यी ज्यी, जिण मांय राजकीय उच्च माध्यमिक बालिका विद्यालय मटका चौक अर गुरुनानक गर्ल्स सीनियर सेकेंडरी स्कूल री टाबरियां सिरकत कीनी। होड़ मांय जीतण वाळां रो गांधी जयंती रे मौके मान कर्यो जावेला। **सवाईमाधोपुर** ज़िला रा डेकवा गांव मांय केंद्रीय संचार ब्यूरो रा क्षेत्रीय कार्यालय री ओर ऊं पोषण—माह, स्वच्छता—ही—सेवा अर सम्पूर्णता—अभियान ऊं जुड़्या कार्यक्रम राख्यी ज्या। **पाली** ज़िला रा रानी री सरकारी सीनियर सैकेण्डरी स्कूल ऊं मानव श्रृंखला बणा र अर शपथ ले र साफ सफ़ाई रो संदेश दियो ज्यो। ज़िला रा बाली मांय विद्यार्थियां मांय साफ सफ़ाई बाबत जाग जगायी ज्यी। झालावाड़ ज़िला रा झालरापाटन मांय सफ़ाई मित्र सुरक्षा शिविर लगायी ज्यो। शिविर मांय सफ़ाई मित्रां री स्वास्थ्य जांच करी ज्यी अर जरूरी राय अर दवाइयां दीरीजी। अकलेरा मांय मजूरां ने साफ—सफ़ाई राखण री शपथ दिरायी ज्यी। **कोटपूतली—बहरोड़** जिला मांय विराटनगर रा पावटा उपखंड मांय महिला अर बाल विकास विभाग री ओर ऊं पोषण मेळो लगायी ज्यो। कार्यक्रम मांय आंगनबाड़ी कार्यकर्तावां री ओर ऊं पोषक तत्व अर मोटा अनाज ऊं बण्या व्यंजनां रो दरसाव करी ज्यो अर आस वाळी लुगाइयां री गोद भराई रो कार्यक्रम राख्यी ज्यो। **पाली** जिला रा गिरादड़ा मांय पोषण माह रा तैत राख्यी ज्या कार्यक्रम मांय पोषण, साफ सफ़ाई, टीका लगावण अर पोषाहार रा बारा मांय जाणकारी दीरीजी अर रंगोली सजायी ज्यी। **सवाईमाधोपुर** मांय आंगनबाड़ी केंद्रां माथे किचन गार्डन अर पोषण वाटिका रा आयोजन राख र महिलावां ने घर मांय फल—तरकारियां रा पौधा लगावण अर वां री सार—संभाळ रा बारा मांय जाणकारी दीरीजी। झुंझुनूं जिला रा बुहाना मांय महिला अर बाल विकास विभाग री ओर ऊं आस वाळी

महिलावां री गोद भराई, बच्चवां सारू अन्नप्राशन कार्यक्रम, बेटी जन्मोत्सव अर पोषक व्यंजन री प्रदर्शनी रा कार्यक्रम राखी ज्या। ई मौके बेहतर काम करण वाळी पांच आंगनबाडी कार्यकर्तावां ने मान पाना दे र नवाजी ज्यी अर पी.एम.एम.वी.वाई रा तैत पात्र लोगां ने चैक दिया ज्या।

00000

राज्य मांय न्यारी—न्यारी सरकारी भर्तियां सारू लीरीजी परीक्षावां रा पेपर लीक करण रा आरोपिता रे खिलाफ असरदार कार्यवाही करी जा रही है। गृह राज्यमंत्री जवाहर सिंह बेढम आज श्रीगंगानगर मांय आ जाणकारी दीनी। एक गैर सरकारी विश्वविद्यालय मांय बणायी ज्या अस्पताल अर दूजा संस्थानां रो दौरा कर्या पाछे वे कहयो के प्रदेश मांय मौजूदा सरकार रा कामां ऊं चोखो राज आयो है। बेढम सेवा पखवाडा अर एक पेड़ माँ के नाम अभियान रा तहत गायां री पूजा कर र चारो खिलायो अर पौधा रोप्या।

00000